



CONVENIO DE COLABORACIÓN ENTRE A CONSELLERÍA DE POLÍTICA SOCIAL E A ESCOLA GALEGA DE ADMINISTRACIÓN PÚBLICA PARA A ORGANIZACIÓN DO CURSO DE CAPACITACIÓN PARA O DESEMPEÑO DA FUNCIÓN DE INSPECCIÓN DE SERVIZOS SOCIAIS

En Santiago de Compostela, 15 de abril de 2021

REUNIDAS

Dunha parte DONA FABIOLA GARCÍA MARTÍNEZ, conselleira de Política Social, nomeada polo Decreto 112/2020, de 6 de setembro, polo que se nomea aos titulares das vicepresidencias e consellerías da Xunta de Galicia, que actúa no exercicio das súas competencias que ten atribuídas polo artigo 34 da Lei 1/1983, do 22 de febreiro, de normas reguladoras da Xunta e da súa presidencia.

Doutra, DONA SONIA RODRÍGUEZ-CAMPOS GONZÁLEZ, directora da Escola Galega de Administración Pública (en adiante EGAP), nomeada polo Decreto 146/2012, do 12 de xullo (DOG nº 134 do 13 de xullo), actuando en nome e representación da EGAP, en virtude das facultades que lle confire o artigo 9 da Lei 4/1987, do 27 de maio, de creación da EGAP;

Teñen, segundo interveñen, a capacidade legal necesaria para formalizar o seguinte **Convenio de Colaboración**, e

EXPOÑEN

PRIMEIRO.- Que a Consellería de Política Social ten competencia para a sinatura do presente convenio segundo o establecido no artigo 34 da Lei 1/1983, do 22 de febreiro, reguladora da Xunta de Galicia e da súa presidencia, modificada polas leis 11/1988, do 20 de outubro; 7/2002, do 27 de decembro; 2/2007, do 28 de marzo e 12/2007, do 27 de xullo.

SEGUNDO.- Que a EGAP é un organismo autónomo de carácter administrativo e unha entidade de dereito público con personalidade xurídica propia, que actúa con plena autonomía funcional para o cumprimento dos seus fins.

TERCEIRO.- Que a Lei 4/1987, do 27 de maio, pola que se crea a EGAP, menciona entre os fins da Escola a formación, o perfeccionamento, a investigación, a documentación, o estudo e a





realización de traballos de divulgación no campo da Administración pública, promovendo á súa máxima difusión.

CUARTO.- Que ambas as dúas partes consideran de mutuo interese para o cumprimento das súas respectivas funcións establecer fórmulas de colaboración no ámbito formativo a través deste convenio.

En virtude do exposto e recoñecéndose ambas as dúas partes na representación que ostentan capacidade suficiente, acordan asinar un convenio de colaboración de acordo coas seguintes

CLÁUSULAS

PRIMEIRA.- Obxecto.

O obxecto deste convenio entre a Consellería de Política Social e a EGAP é a colaboración para a organización conxunta do curso de capacitación para o desempeño da función de inspección de servizos sociais dirixido a persoal funcionario dos subgrupos A1, A2 e C1 e persoal laboral dos grupos I e II preferentemente con titulación universitaria (licenciatura ou grao correspondente) en dereito, psicoloxía, pedagogía, psicopedagogía, educación social, relacións laborais, traballo social, ciencias políticas, socioloxía, terapia ocupacional, enfermía, fisioterapia ou medicina.

SEGUNDA.- Dereitos e obrigas.

A Consellería de Política Social e a EGAP para a organización e a convocatoria das actividades derivadas deste convenio adquiren o compromiso de colaborar na súa organización e desenvolvemento, de acordo co sinalado na cláusula terceira.

TERCEIRA.- Actuacións.

1ª As actuacións que levará a cabo a Consellería de Política Social son as seguintes:

- Financiar as actividades derivadas deste convenio mediante a achega das cantidades sinaladas na cláusula quinta.
- Establecer o programa formativo do curso, o seu calendario, o persoal docente e o número de persoas destinatarias da acción formativa resultante do previo procedemento de selección.
- Levar a cabo o seguimento das probas de cada módulo.





d) Realizar a proba final.

e) Propor a lista de alumnos/as que superen o curso para a expedición do certificado acreditativo pola EGAP.

2ª As actuacións que levará a cabo a EGAP son as seguintes:

a) Xestionar o proceso de matrícula no curso e propoñer a selección das persoas solicitantes, que deberá ser confirmada pola Consellería de Política Social.

b) Pór a disposición a súa plataforma informática e as súas instalacións para o desenvolvemento do curso.

c) Expedir o certificado de aptitude do alumnado que supere o curso.

d) Avaliar as actividades derivadas deste convenio mediante o cuestionario de satisfacción que porá a disposición do alumnado ao remate da acción formativa.

CUARTA.- Establecemento dunha Comisión Mixta de Seguimento.

Para o bo desenvolvemento das actividades obxecto do convenio establecerase unha Comisión Mixta, de composición paritaria, integrada por representantes de cada unha das partes que asinan este convenio, á que corresponderá a concreción, o seguimento, a interpretación e a avaliación das accións derivadas deste convenio.

Nesta comisión actuarán como representantes por parte da Consellería de Política Social, a persoa titular dunha subdirección xeral que designe a persoa titular da Secretaría Xeral Técnica e a persoa titular dun servizo que designe a persoa titular da Secretaría Xeral Técnica, ou persoas que as suplan e por parte da EGAP, a persoa responsable da secretaría xeral e a persoa titular dun servizo da entidade designado pola persoa titular da EGAP, ou persoas que as suplan..

Á citada Comisión seralle de aplicación o establecido na Lei 40/2015, do 1 de outubro, de réxime xurídico do sector público e na Lei 16 /2010, do 17 de decembro, de organización e funcionamento da Administración xeral e do sector público autonómico de Galicia.

A Comisión de Seguimento terá, sen prexuízo do establecido no artigo 49 f) da Lei 40/2015, do 1 de outubro, de réxime xurídico do sector público respecto das funcións do órgano de vixilancia e control, as seguintes funcións:



- 1.- Seguir, interpretar e avaliar as accións derivadas deste convenio.
- 2.- Adoptar ou propoñer as medidas necesarias para garantir o exercicio coordinado das competencias de cada unha das partes.

QUINTA.- Orzamento.

Para o desenvolvemento das actuacións previstas no convenio, a colaboración entre as partes organízase do seguinte xeito:

- A Consellería de Política Social colaborará economicamente coa achega dun importe de 10.350,00€ (IVE engadido) con cargo á partida orzamentaria 13.01.311A.226.06 do orzamento da Xunta de Galicia para o ano 2021, para a realización dunha edición da actividade "Curso de capacitación para o desempeño da función de inspección de servizos sociais".
- A EGAP colaborará coa posta a disposición das súas instalacións, dos seus medios telemáticos e cos seus medios persoais e materiais. A sinatura deste convenio non implica, por parte da EGAP, compromiso de gasto con cargo ás partidas orzamentarias do estado de gastos do orzamentos xerais da Comunidade Autónoma de Galicia para o exercicio corrente.



SEXTA.- Inexistencia de relación laboral.

A subscrición deste convenio non implicará relación laboral, contractual ou de calquera outro tipo entre os profesionais que realicen as actividades obxecto deste convenio e a EGAP.

SÉTIMA.- Dereitos de uso e propiedade industrial e intelectual.

Os dereitos de propiedade intelectual e industrial sobre a totalidade das creacións resultado deste convenio, son titularidade conxunta da Consellería de Política Social e da EGAP.

As partes necesitan a autorización expresa da outra para proceder á edición, representación, gravación e reprodución audiovisual, informática, ou por calquera outro medio, formato o soporte, do resultado e dos materiais froito do desenvolvemento do proxecto.

OITAVA.- Modificación, Denuncia e Resolución do Convenio

As partes poderán modificar ou resolver este convenio en calquera momento por mutuo acordo. Así mesmo, poderán denunciar este convenio en calquera momento por vontade expresa de calquera das partes cun aviso previo de quince días naturais.

O incumprimento de calquera das obrigas contraídas neste convenio por unha das partes facultará á outra para resolvelo, cos efectos que legalmente procedan.

NOVENA.- Réxime xurídico e resolución de conflitos.

Este convenio ten natureza administrativa e rexerase pola Lei 40/2015, do 1 de outubro, de réxime xurídico do sector público, pola Lei 39/2015, do 1 de outubro, do procedemento administrativo común das Administracións Públicas, pola normativa aplicable en materia de contratos do sector público, polas demais normas de dereito administrativo e, no seu defecto polas normas de dereito privado.

Terase en conta o establecido no artigo 15 da Lei 1/2016, do 18 de xaneiro de transparencia e bo goberno e no Decreto 126/2006, do 20 de xullo, polo que se regula o Rexistro de Convenios da Xunta de Galicia.

No caso de conflitos estarase ao disposto no artigo 18 da Lei 14/2013, do 26 de decembro, de racionalización do sector público autonómico. Sen prexuízo disto, as cuestións litixiosas que poidan xurdir sobre o contido e a aplicación deste convenio, serán de coñecemento e competencia da Orde xurisdiccional do contencioso- administrativo.

DÉCIMA.- Consentimento das partes en materia de protección de datos.

As persoas asinantes deste convenio manifestan o seu consentimento para que os seus datos persoais que aparecen neste e maillo resto de especificacións nel contidas poidan ser publicados no Portal de Transparencia e Goberno Aberto. Tamén manifestan o seu consentimento para que as rúbricas deste consten nas copias que se remitan para a súa publicación no referido portal.

As partes asinantes sométense ao cumprimento do Regulamento (UE) 2016/679 do Parlamento Europeo e do Consello do 27 de abril de 2016 relativo á protección das persoas físicas no que respecta ao tratamento de datos persoais e á libre circulación destes datos e






polo que se derroga a Directiva 95/46/CE (Regulamento xeral de protección de datos) e a Lei Orgánica 3/2018, do 5 de decembro, de Protección de Datos Persoais e garantía dos dereitos dixitais.

UNDÉCIMA.- Vixencia

Este convenio estenderá a súa vixencia dende a data da sinatura por todas as partes ata o 31 de decembro de 2021, podendo prorrogarse por mutuo acordo das partes antes da súa finalización, ou de cada unha das súas prórrogas, salvo denuncia de calquera das partes antes do seu termo.

Este convenio de colaboración obriga ao cumprimento do expresamente pactado, someténdose todas as partes ao acordado en todas as estipulacións, e subscríbese como proba de conformidade na data que figura ao dorso.

Pola Consellería de Política Social



Fabiola García Martínez

Pola Escola Galega de
Administración Pública,



Sonia Rodríguez Campos González